

አሞጾ ተንቢቱ ጊዶ ቆፋ

አሞጾስ ተንቢቱ ሃሳያ ኤራቴሊ ዳና፤ ኢዚ ተንቢቱ ሃሳዮ ተሚርቱ ታማርቤና። [7:14] ጊዶ አቲን ኢዚ ፑዴ ሃን ዲዛ ካዎቴላ ጋርሳን ዲዛ ዳሬዛስ ኢዚ ኪታ ጋላና ማላ ኪቴቲዳ ዎዴ አሞጾይ ዩሁዳን ዲዛ ቱቁሄ ጌቲቲዛ ካሴ ኢዚ ዲዛ ጉታዮ ዩጊዲ ቢዴስ። ኢዚ ሄፔካ ዴንዲዲ ኢሰራኤሌ አሳስ ኤሬቲዳ ጎይናሶ ጊዲዳ ጌዴ ቤቴሌ ካታማ ቢዴስ። ሃይሳ ሃ ማጻፋዛን ኮይሮ ቦላ አሞጾይ ዳሬዛ አማቴስ፤ ሃሳፌ ኢሰራኤሌ አሳ ሃራፔካ ሎኦ ዲሲ ዲዛ ዲሬታ አማቴስ። ሄ ዲሬቲ ዳሬዛ ቦንቂዲ ባስ አይሌ ሂስቲ ሃራናስ ኢስታስ ጊታ ዎልቃይ ዴስ። ኢስታፌ ዳርቲ ጎይናናስ ሃራ ኤቃ ጸሳቲ ዲኮካ ኢስታ ናጊዛይ ጎዳ ጊዲዳይሳ ባ ዎዚናን ቆፔቴስ። አሞጾይ ጊዲኮ ኢስቲ ባ ናጋራ ጊሻስ ቃጻዬታናይሳ ኢስታስ ዮቲዴስ። «ኢታ ሚሽ ኢጲቲ ሎኦ ጊዲዳዚ ሲቂቲ። ፒርዳ ፒርዲዛሶን ፒርዳ ቱጮፍቴ። ሜዴቴላ ጎዳይ አቲዳ ኢሰራኤሌ ዳራ ኢዚ ማሮንታ አጌና።» [5:15]

ሃ ማጻፋይ ኦይኪዳ ኩሜላ ቆፋ

ዳሬቲ ባ ሞሮን ቃጻዬቴስ 1:1—3:2

ኢሰራኤሌይኔ ሳማሪያይ ዳያና ዳይስ 3:3—6:14

ኢሰራኤሌ ቂጻቴ ጊሻስ አሞጾይ ቤኢዳ ኢቻሹ አጂታታ 7:1—9:10

ኢሰራኤሌስ ዲዛ ሎኦ ሂዶታ 9:11-15

¹ ኦዚያይ ዩሁዳ ካዎ፤ ሃሳሶካ ኢዮአሳ ና ኢዮርባአሜይ ኢሰራኤሌ ካዎ ጊዲ ዲሺን ሄሲካ ቢታይ ቃጻናፔ ናሞኡ ላይላፌ ሲንሳን ኢሰራኤሌ ጊሻስ ቱቁሄን ሜሄ ሄሚዛይታ ጊዶፌ አሞጾይ ቤኢዲ ዮቲዳ ቃላይ ሃይሳፌ ካሊ ዲዛይሳ፤

² አሞጾይ፤

«ጎዳይ ጲዮኔፔ

ባ ቃላ ቶቁ ሂስቲ ሲሴስ፤

ዬሩሳላሜፔ ጊሬስ፤

ሜሄይ ሄሜቲዛሶቲ ሜላና፤

ቃርሜሎሴ ዙማን ዲዛ

ጨሊላቲ ሹላና» ጊዴስ።

- ኢስራኤል ሄራን ዲዛ ዳሬታ ቦላ ያና ፒርዳ
³ ጎዳይ አራሜስ፤
 «ዳማስቆ አሳይ ዛሪ ዛሪዲ
 ኦሊዳ ናጋራ ጊሻስ
 ታ ኢስታ ቃጸዮንታ ኣጊኬ፤
 ኢስቲ ጋላአዴ አሳ
 ቢራታ ኣቻራ ዲዛ ካል
 ቡኪዛ ሎዳን ቡኪዳ።
- ⁴ ካዎ አዛሄሌ ኬላን
 ታማ ዬዳና፤
 ሄ ታማይ ካዎ ቤኒ-ሃዳዴ
 ሚጸታ ማና።
- ⁵ ዳማስቆ ካታማ ፔንጌታ
 ታ ሜንሴሬላና፤
 ቤቲ-ኤዴኔ ዳሬ ካዎዛኔ
 አዌ ዙላን ዲዛ አሳ
 ታ ጳይሳና፤
 አራሜ ዳሬ አሳይካ ዲኤቲዲ
 ጌዴ ቂሬ ዳሬ ባና» ጌስ።
- ⁶ ጎዳይ ፊሊስጶሜስ፤
 «ጋዛ አሳይ ዛሪ ዛሪዲ ኦሊዳ
 ናጋራ ጊሻስ
 ታ ኢስታ ቃጸዮንታ ኣጊኬ፤
 ኢስታ ዳሬዛ ኡባ ዲኢ ኤፊዲ
 ኤዶሜስ ባይዚዳ።
- ⁷ ኢዚ ጊምቤታ ማና ማላ
 ጋዛ ሚጸን ታኒ ታማ ዬዳና።
- ⁸ አስቄሎና ዳሬ ካዎዛኔ
 አሽዶዴ ዳሬ አሳ
 ታ ፒታ ጳይሳና፤
 ፊሊስጶሜን ዲዛይቲ
 ወሪ ወራና ጋካናስ
 ታኒ ታ ኩሼ አቃሮኔ ቦላ
 ዴንላና» ጌስ።
- ⁹ ጎዳይ ጲሮሴስ፤ «ጲሮሴ አሳይ
 ዛሪ ዛሪዲ

- ኦሊዳ ናጋራ ገሻሰ
 ታ ኢሰታ ቃጸዮንታ ኣጊኬ፤
 ኢሰቲ ባ ኢሻቴላ
 ጫቆ ቃላ ላሊዲ
 ባ ዲኢዳ ዳሬዛ
 ኡባ ኤዶሜሰ ባይዚዳ።
- 10 ሄሳ ገሻሰ ታኒ ጸረሴ ካታማ
 ገምቤታ ቦላ ታማ ዬዳና፤
 ሄ ታማይ
 ኢዚ ሚጻታካ ማና» ጌሰ።
- 11 ጎዳይ ኤዶሜሰ፡ «ኤዶሜ አሳይ
 ዛሪ ዛሪዲ ኦሊዳ
 ናጋራ ገሻሰ
 ታ ኢሰታ ቃጸዮንታ ኣጊኬ፤
 ኢሰቲ ባ ኢሻታ
 ኢሰራኤል ናይታሰ
 ቃጼቶንታ ማሻን ጎዲዳ፤
 ባ ሃንቆ ዶሺሶንታ ኤዲዲ
 ኢሰታሰ ሚሼቶንታ
 ኡባ ዲፒ ሂሰቲዳ።
- 12 ሄሳ ገሻሰ ታኒ
 ቱማኔ ገምቤታ ቦላ
 ታማ ዬዳና፤
 ሄ ታማይ
 ቦጲራ ሚጻታካ ማና» ጌሰ።
- 13 ጎዳይ አሞኔሰ፡
 «አሞኔ አሳይ ዛሪ ዛሪዲ
 ኦሊዳ ናጋራ ገሻሰ
 ታ ኢሰታ ቃጸዮንታ ኣጊኬ፤
 ኢሰቲ ዳሬ ዛዋ አሳናሰ
 ጋላአዴ ዳሬ
 ሻራ ማጫሳታ
 ኡሎ ዳኪዳ።

1:10 ኢሳ 23:1-8፤ ሂዚ 26:1—28:19፤ እጾ 3:4-8፤ ዛካ 9:1-4፤ ማቶ
 11:21-22፤ ሉቃ 10:13-14 1:11 ኢሳ 34:5-17፤ 63:1-6፤ ኤር 49:7-22፤
 ሂዚ 25:12-14፤ 35:1-15፤ ኣብ 14፤ ሚል 1:2-5 1:13 ኤር 49:1-6፤ ሂዚ
 21:28-32፤ 25:1-7፤ ሶፎ 2:8-11

- 14 ሄሳ ጊሻስ ኤራባ ካታማ
 ገምቤታ ቦላ
 ታኒ ታማ ዬዳና፤
 ሄ ታማይ ኢስታ ሚጸታ ማና።
 ሄሳፌ ጉዬ ኦላ ጋላሳን
 ዋሶይ ዳራና፤
 ኦላዚካ ሳቴ ጫርኮ ማላ
 ኤሶታና።
- 15 ኢስታ ካዎይኔ
 ዳናቲ ዲኤታና» ጌሰ።

2

- 1 ጎዳይ ሞክቤስ፥
 «ሞክቤ ኣሳይ ዛሪ ዛሪዲ
 ኦሊዳ ናጋራ ጊሻስ
 ታ ኢስታ ቃጸዮንታ ኣጊኬ፤
 ኢስቲ ኤደሜ ካዎ ሜቄሊ
 ቢዲንሐ ጊዳና ጋካናስ ጸጊዳ።
- 2 ሄሳ ጊሻስ ታኒ ሞክቤ ቦላ
 ታማ ዬዳና፤
 ሄ ታማይ ቂሪያቲ
 ሚጸታ ማና።
 ኦላንቻቲ ማጉልሐ፥
 ዋሶኔ ዛዬ ጊሪስ ሲሲሼ
 ሞክቤ ኣሳ ዋጂ ዉርሳና።
- 3 ታኒ ኢስታ ሃሪዛ ካዎዛኔ
 ዳናታ ኡባ ጳይሳና» ጌሰ።

- 4 ጎዳይ ዩሁዳ፥ «ዩሁዳ ኣሳይ
 ዛሪ ዛሪዲ
 ኦሊዳ ናጋራ ጊሻስ
 ታ ኢስታ ቃጸዮንታ ኣጊኬ፤
 ኢስቲ ታ ዋጋ ካጂዳ፤
 ታ ኣዛዞታካ ናጎንታ ኢጲዳ፤
 ካሴ ኢስታ ኣዋቲ ጎይኒዳ ኤቃ
 ጸሳታ ካሊዲ ኢስቲ ባሌቲዳ።

- 5 ሄሳ ገሻስ ታኒ ዩሁዳ ቦላ
 ታማ ዬዳና፤
 ሄ ታማይ ዬሩሳሌም
 መጸታ ማና» ጌሰ።
- 6 ጎዳይ ኢስራኤሌስ፤
 «ኢስራኤሌ ኣሳይ
 ዛሪ ዛሪዲ ኦሊዳ
 ናጋራ ገሻስ
 ታ ኢስታ ቃጸዮንታ ኣጊኬ።
 ጸሎ ኣሳታ ቢራስ፤
 ሜቶተዳይሳ ቶሆ
 ጫማስ ባይዚዳ።
- 7 ኢስቲ ማንቆታ ጉዲላ ቦላ
 ጌንዴሪሲዲ ኢስታ
 ሁኤ ዬጴቴቴስ፤
 ቆሄተዳይታስ ጌላ ፒርዴቴስ፤
 ኣዋይኔ ናይ
 ኢሲ ማጫሳይራ ላይማቴቴስ፤
 ኢስቲ ሄሳሶ ኦሊ ኦሊዲ
 ታ ሱንሐ ቱሲቴስ።
- 8 ኣሳፔ ኦይሶ ኤኬቲዳ
 ማይኦ ሂጲዲ
 ያርሾ ያርሺዛሶዛ
 ጋርሳን ኣቄቴስ፤
 ኢስቲ ባንታ ጸሳ ኬፋን
 ኤዳሲ ኤከዲ ዋይኔ ኡሹ
 ኢዛን ኡዬቴስ።
- 9 «ኢስታስ ኣዲሳቴላይ
 ዚጋ ሚላ ማላ፤
 ሚኖቴላይካ ጸዳ ማላ
 ጌዲዳ ኣሞሬ ኣሳ ታኒ
 ኢንቴ ሲንላፌ ጳይሳዲስ፤
 ኣይፎንታ ማላ
 ጸጸፔ ሾዳ ዲጋዲስ።
- 10 ታኒ ኢንቴስ ኣሞሬ ዴሬ
 ቢታ ኢማናስ

- እንቴና ጊብጾፔ ከሳዲሰ፤
 ኦይዲ ታሙ ላይሰ ኩሜሰ
 ባዘራ ካሌላ
 ኤሃዳ ላቲሳዲሰ።
 11 ቃሴካ ታኒ እንቴ
 አቱማ ናይታ ጋርሳፌ ናቤታ፥
 ናቴላታ ጊዶፌ
 ናዚራዊታ ዴንላዲሰ።
 ኢሰራኤሌ ዴሬዞ!
 ሄሲ ቱሙ ጊዴኔ?» ጌሰ።
 12 ጸሳይ፥ «እንቴ ጊዲኮ ናዚራዊታ
 ዋይኔ ኡሹ ኡሹዴታ፤
 ናቤታካ ተንቢቱ
 ዮቶንታ ማላ አዛዚዴታ።
 13 በኢቲ ዳሮ ካሰ ዴዴቲ
 ጫኔቲዳ ጋሬይ
 ጋርሳራ ዲዛ ሚሽ ሊቂሲዛ ማላ
 ታኒካ እንቴና ሊቂሳና።
 14 ፒላታ አሲ ኬሲ ኤኪ አቴና፤
 ሚኖይካ ባ ሚኖቴላን
 ማዴቴና፤
 ዋልቃማይካ
 ባ ሼምፖ አሼና።
 15 ዋንዳፌ ኦይኪዳዴይ ባ ዲዛሶን
 ሚኒ ኤቂዲ ኦላ ዛሬና፤
 ፒላታ ኦላንቻይካ
 ዋጺ አቴና፤
 ቶጋንቻይካ ባ ሼምፖ አሼና።
 16 ኦላ ቃራቲካ ሄ ጋላሰ
 ጎሮ ካሎ ባቃታና» ጌሰ።

3

ኢሰራኤሌ አሳ ቦላ ጋካና ሃንቆ

- 1 ኢሰራኤሌ አሳወ! ጊብጾፔ ኬዚዳ ኢሰራኤሌ አሳሰ እንቴሰ
 ጎዳይ ዮቲዳ ቃላ ሃይሳ ሲዩቴ።
 2 ጸሳይ፥ «ኩሜላ አላሜን ዲዛ ዴሬ
 ኡባፌ ታ እንቴና ጸላ ዶራዲሰ፤
 እንቴ ኦሊዛ

- ናጋራ ኡባ ገሻሰ
ታ ኢንቴና ቃጸያይሰ» ጌሰ።
- 3 ናዎኤ አሳቲ ኦጌ ኢሲፌ ባና ጊዲ
ቃቸንታ ኣጊኮ
ኢሲፌ ባናሰ ዳንዳይዞ?
- 4 ጋዋይ ዋራ ጊደን
ኣይኮ ሚዛ ሚሽ
ሻንካቲ ዴዋንታ ዲሼ
ጮ ሚላ ጸጊ ኤሪዜ?
ዎዳላ ጋዋይ
ኣይኮ ሚዛ ሚሽ
ዴዋንታ ዲሼ ባ ዲዛሶን
ጮ ሚላ ባ ቃላ ሲሲ ኤሪዜ?
- 5 ያርዴይ ዋይኮ ጊቲይ ባይንዳሶን
ጮ ሚላ ጋዴን
ካፎይ ኦይኬቲ ኤሪዜ?
ዎይኮ ዲዛይ ኢሲ ሚሺ ባና
ቦቸንታ ዲሺን
ጮ ሚላ ፒሪ ኤሪዜ?
- 6 ካታማ ጊደን ኦላሰ
ዛዬይ ፑኔቲሺን
ባቦን ኮኮሮንታ ኣሲ ዲ ኤሪዜ?
ጎዳ ሸኔይ ባይንዳ ዲሺን
ካታማ ቦላ ኢታ ሚሺ
ጋኪ ኤሪዜ?
- 7 ጎዳይ ባ ጹራ ባ ኦሳንቻ
ናቤታሰ ኮይሮቲ ዮቶንታ ዲሼ
ኣይኮካ ኦሌና።
- 8 ጋዋይ ጸጊን ሲዱዲ
ዲጋዋንታይ ኦኔ?
ጎዳይ ባ ጹራ ኢዛሰ ዮቲን
ቲንቢቱ ሃሳዮንታይ ኦኔ?

ሳማሪያ ኩንዴል

- 9 ኣሽድዴኒኔ ጊብጾን ዲዛ
ሚጸታን ዲዛ ኡባሰ፤
«ሳማሪያ ዙማታ ቦላ ሸቂቲ፤
ሄን ኢሰታን ኦሴቲዛ

- ጌኔ አሶኔ
 ቡልኣኬቲዛይሳ ደሊቱ»
 ጊ አዋጁቴ።
- 10 ጎዳይ፥ «ሃይቲ ዳሬቲ ሎኦ
 ኦሶ ኤሬቴና።
 ማካላኒኔ
 ጌኔን ኤቢዳ ሚሻን
 ባ ሚጸ ኩንፊቴሰ።
- 11 ሄሳ ጊሻሰ ኢንቴ ዳሬ
 ሞርኬይ ዋራጃና፤
 ኢንቴ ሚጸታ ላሊዲ
 ኢንቴ ኬላካ ቦንቃና» ጌሰ።
- 12 ጎዳይ፥ «ሄንላንቻይ
 ጋሞ ዶናፔ
 ዶርሰ ዋሊ ኤኪዛ ዋዴ
 ዶርሳሰ ናሞኡ ጌዳታ ዋይኮ
 ዲጸ ሃይላታ
 ዋሊ ኤኪዛ ማላ
 ሳማሪያ ቢታን ኢሻሎን ኡቲዳ
 ኢሰራኤሌ አሳፔ ጉላቲ
 ጸላ አታና» ጌሰ።
- 13 ሳሎ ጎዳይ፥
 «ሄኮ ኣኔ ሃይሳ ሲዩቴ!
 ያቆቤ ዜሬላ ቦላ
 ማርካቲቴ።
- 14 ኢሰቲ ኦሊዳ ናጋራ ጊሻሰ
 ታኒ ኢሰራኤሌ
 አሳ ቃጸዪዛ ዋዴ
 ቤቴሌን ዲዛ
 ያርሾ ያርሺዛሶሆታ
 ታኒ ላላና፤
 ያርሺዛሶሆታ ቦላ ዲዛ
 ካጨቴ ሜቄሬቲ ኩንዳና።
- 15 ኢሰቲ ኢዛን ቦኔኔ ባልጎ ዲዛ
 ኬላታ ኡባ
 ታ ላላ ጳይሳና፤
 ዳንጋርሳ ዛሌን

ሎኤሊ አሌቂሲዳ
ኬላቲ ወሪካ ላሌታና፤
ጌታ ኬላቲ
ወሪካ ቆያና» ጌሰ።

4

¹ ቋኬቲዳ ባሳኔ ሚዛታ ማላ አንቱ አሳቲላ ኦርዲሲዳ ሳማሪያ ማጫሳቶ! ሃይሳ ቃላ ሲዪቴ! አንቱ ዳቡራንቻታ ካወሼታ፤ ማንቆታ ቦላካ ጎዳቲታ፤ አንቱ አዚናታ፡ «ኮሰ ማሶሲዛ ኡሹ ኤሂቲ» ጌታ።

² ሄሳ ጊሻሰ ጎዳይ ባ ጌሻቲላን፡ «አንቲሰ ሲዴን ዳፎይ አቋን አንቱ ባና ዋዳይ ያና፤ አንቲፌ ሄን ቢታ ቦላ አቲዳይቲ ቃሴ ማንጸኮን ኦይኬቲ ቢዛ ሞሌ ማላ ኦይኬቲ ባና።

³ «አንቲፌ ኢሶይ ኢሶይ አንቱ ማታን ዲዛ ሉኮራ ጎሼቲ ጎሼቲ ኬዚዲ ጌዴ ሄሪሞኔን ዩጌታና» ጌ ጫቂዳሰ።

ኢሰራኤሌ አሳይ ባንታ ባላፔ ሲሚቤቴና

⁴ ጎዳይ፡ «ኢሰራኤሌ ዳሬዞ!
ቤቴሌ ቢዲ ናጋራ ኦሊቴ!
ጌልጌላካ ቢዲ
ናጋራ ጉጂ ኦሊቴ!
ጋላሰ ጋላሰ
አንቱ ያርሾ ያርሺቴ!
ሄቫንሶ ጋላሰ ጋላሰ
አንቱ አሰራታ ኢሚቴ።

⁵ አንቱ ኦላናሰ ኮይዛይ
ሄሳ ጊዲዳ ጊሻሰ
ኢርሾይ ኢዛን ዲዛ ኡኬሶ
ጋላታ ያርሾ ሺሺቴ፤
አንቱ ሄሳ አንቱ ሼኔ ማላ
ሺሺዛ ጊሻሰ
ኢዛን ጨቄቲቴ» ጌሰ።

⁶ «አንቲሰ ዶናን ባቆና ካላራ ታ ቆይሳዳ አንቱ ካታማታን ኡባን ኮሻ ዩዳዲሰ። አንቱ ጊዲኮ ሃ ታኮ ሲሚቤኬታ።

⁷ አንቱ ካላይ ጋካናፔ ቡሮ ሄቩ አገናይ ዲሺን ሲንላታ ታ አንቲሰ ኢራይ ቡኮንታ ማላ ዲጋዲሰ፤ ኢሲ ካታማን ቡኪሺን ሃራ ካታማን ቡኮንታ ማላ ዲጋዲሰ፤ ኢሲ ጋዴን ቡኪሺን ሃንኮ ኢሳ ጋዴን ኢራይ ቆዩን ሜሊዳሰ።

8 አሳይ ሃላ ኡያናሰ ኮዪሼ ሃ ካታማፔ ሄ ካታማ ቢዴሰ፤
ጊዶ አቲን ባሰ ጊዲዛ ሃላ ዴሞንታ ኣጊዳ ጊሻሰ ኡዪዲ አላናሰ
ዳንዳይቤቱና፤ ኢንቴካ ታኮ ሲሚቤኬታ።

9 «ኢንቴ ካላ ሜሊሲዛ ሃርጌ ታ ኪታዲሰ፤ ኢንቴ ኢንቴ
ኣታኪልቴኔ ዋይኔ ሚላታ፡ ባላሴኔ ዋጋራ ሚላታ ኡባ ቦሌይ
ሚዴሰ፤ ጊዶ አቲን ኢንቴ ሃ ታኮ ሲሚቤኬታ» ጌሰ።

10 «ታ ካሴ ጊብጼ ቢታ ቦላ ዬዲዳ ኢታ ሃርጌዛ ማላ ሃርጌ
ኢንቴ ቦላ ዬዲዳሰ፤ ኢንቴ ናቴላ ናይታ ማሻን ሃይቃና ማላ
ኦላዲሰ፤ ኢንቴ ፓራታካ ዲኤታና ማላ ታ ኦላዲሰ፤ ኢንቴ ዲዛሶን
ሃይቂዳ አሳ ኣሃ ጸንቆይ ኢንቴ ሲጼ ቱጨዴሰ፤ ኢንቴ ጊዲኮ ሃ
ታኮ ሲሚቤኬታ።

11 ሶዶሜኔ ጋሞራ ካሴ ታ ቆይሲዳ ማላ ኢንቴፌ ዳርታካ ታ
ቆይሳዲሰ፤ ኢንቴ አቲዳይቲካ ታማይ ሚሺን አቲዳ ሚላ ዱርጫ
ማላ ጊዲዴታ ሺን ኢንቴ ሃ ታኮ ሲሚቤኬታ።

12 «ኢንቴኖ ኢሰራኤሌ አሳቶ
ታኒካ ኢንቴ ቦላ
ሄሳሶ ኦላና፤
ሄሳ ጊሻሰ ኢንቴ ታናራ
ኢንቴ ጎዳራ ጋይታናሰ
ኣኔ ጊጌቲቲ!» ጌሰ።

13 ዙማታ ኦሊዳዴይ
ጫርኮታ ሜዲዳዴይ
ባ ቆፒዳይሳ አሳሰ ቆንጨሲዛይ
ጋላሳ ፖኦ
ጌዴ ቆማን ላሚዛይ
ቢታ ቦላ ቆቃሶሆን
ሄሜቲዛይሳ
ሱንሳይ ጎዳ ሳሎ ጸሳ።

5

ኢሰራኤሌ አሳ ማሬቴላ

1 ኢሰራኤሌ አሳዉ! ኢንቴ ጊሻሰ

ታ ዚላሊዛ ዚላሰ ሲዪቲ።

2 «ጌላኦያ ኢሰራኤሌይ ከንዳዲሰ፤

ናሞኣንሶ ዴንዳናሰ

ዳንዳዩኩ፤

ኢዘ ማዲ ዴንላናይ

ባይንዳ ጊሻስ
ኢዛ ባርካ ባ ዳሬን
ኩንዳ አታና።»

- 3 ኡባ ሃሪዛ ጎዳይ፥
«ኢስራኤል ካታማ ኢስኔይፔ
1,000 ኦላንቻቲ ኦላስ ባናሺን
ኢስታፌ ሃይቆንታ ፓጾ አታናይ
100 አሳታ ጸላ ጊዳና፤
ሃራ ካታማፔካ 100
ኦላ አሳቲ ኦላስ ባናሺን
ኢስታፌ 10 ኣሲ ጸላ
ሲሚ ያና» ጊዴሰ።

- 4 ጎዳይ ኢስራኤል አሳስ፥
«ኢስራኤል አሳዉ!
ሃ ታኮ ሲሚቲ፤
ኢንቴ ሃይቆንታ ዴኣና።
5 ኢንቴ ቤርሳቤሄ ቦፒቲ፤
ቤቴሌይ ላሌታዳ
ሙሌራ ቋያና፤
ጌልጌላን ዲዛ አሳይ ዲኤታና፤
ሃሳ ጊሻስ ቤቴሌ ጊዲን
ዎይኮ ጌልጌላ ቦፒቲ» ጊዴሰ።

- 6 ሃ ጸሳኮ ሲሚቲ፤
ሂስቲኮ ኢንቴ ሼዎፖራ
ፓጾ ዴኣና፤
ኣካይ ጊኮ ጸሲ
ታማ ማላ
ኢስራኤል ዴራ ማና፤
ቤቴሌን ዲዛይታካ
ታማይ ማና፤
ሄ ታማ ቶይሳናይ
ኢስታስ ቤቴና።

- 7 ኢንቴኖ ፒርዳ ጌላሲዛይቶ!
ቱማካ ጌዴ ዎርዶን
ላሚዛይቶ

- ኢንቴስ ኣዬ ኣና!
8 ፒሊያዲሴ ጌቴቲዛ ላፑን
ጸሊንቴታኔ

- ኦርዮኔ ጌቴቲዛ
 ኢሲ ቦላ ዲዛ
 ጸለንቴታ ሜዲዳይ
 ጋላሳ አማርሳን፥
 አማርሳ ጋላሳን ላሚዛይ፥
 አባ ሃሰ አዛዚዲ
 ቢታ ቦላ ጎጊሲዛይ፥
 9 ዋልቃማታኔ ኢሰታ ሚጸታ
 ላሊ ዳይሲዛይ ኢዛ፤
 ኢዛሰ ሰንሳይካ ጸላ።
- 10 አንቴ ቃሴ አንቴና ፒርዳሶን
 ሃንቁዛዴ ኢዴታ፤
 ቱሙ ሃሳይዛዴካ ካዴታ።
- 11 ማንቆታ ኡንኤቤታ፤
 ኢሰታ ዋልቃራ ካሰ ገሪሴታ፤
 አንቴሰ ማሴቲዳ ሹቻፌ
 ኬሰ ኬዲዴታ ሺን
 ሄ ኬሳን ዴኬታ።
 አራዳ ቢታን ዋይኔ ሚላ
 ቶኪዴታ ሺን ኢዛፔ
 አጌቲዳ ዋይኔ ኡሹ ኡዬኬታ።
- 12 አንቴ ቆሆይ አይ ማላ ዳርኮኔ
 አንቴ ናጋሪይ አይ ማላ ዴጸኮ
 ታ ኤራይሰ፤
 አንቴ ጸሎ አሳታ ኡንኤቤታ፤
 ማታኤ ኤኪዲ ፒርዳሶን
 ማንቆታሰ ጌላ ፒርዴታ።
- 13 ሄሳ ገሻሰ ሄ ዋዴ
 ዋዴይ ኢታ ገዲዳ ገሻሰ
 አኬካይ ዲዛ አሲ ጮኡ ጌሰ።
- 14 አንቴ ሼምፖራ ፓጾ ዴኣና ማላ ሎኦፔ አቲን ኢታ ኦላፍቴ፤
 አንቴ ሄሳላ ኦላኮ አንቴ ገዳ ማላ ጎዳይ ሳሎ ጸሳይ አንቴናራ
 ገዳና።
- 15 ኢታ ሚሽ ኢዲቲ፤ ሎኦ ገዲዳዝ ዶሲቲ፤ ፒርዳ ፒርዲዛሶን
 ቱሙ ፒርዳ ጌላሶፒቲ። ጎዳይ ሳሎ ጸሳይ አቲዳ ኢሰራኤሌ አሳ
 ማራናኮ ኦኔ ኤሪዛይ?
- 16 ሄሳ ገሻሰ ጎዳይ ሳሎ ጸሳይ፥

- «ኦጌ ቦላኔ ዲቡሻይ ዲዛሶን
ኡባን ዋሶይኔ ዬሆይ
ሲዬታና፤
 ጎሻንቻቲ ኮይሳስ
 ዚላሊዛይቲ ዬሆስ ጴይጌታና።
- 17 ዎይኔ ሚሊ ቶኬቲዛሶን
ኡባን ዬሆ ጸላ ጊዳና፤
ሄሲካ ዉሪ ሃናናይ ታ ኢንቲ
ጊዶራ አፄዛ ጊሻሳ» ጌስ።

ጸሓፊ ፕሮግራም

- 18 ኢንቴሮ ጎዳ ጋላስ ናጊዛይቶ!
ኢንቴስ አዬ አና!
ሄ ጋላሳይ ቋማፔ አቲን
ፖኦ ጋላስ ጊዶንታ ጊሻስ
 ኢንቴ አይስ ሄ ጋላሳ ኮዬቲ?
- 19 ሄ ጋላሳይ አሲ ጋሞፌ አታናስ
ቆቲቲሼ ዛርዶራ ጋጊዛ ማላ
ዎይኮ ኬሲ ኤኪ ባሶ ጌሊዲ
 ባ ኩሼን ኬላ ጎዳ ኦይኪን
 ሾሺ ዴኪዳ ማላ ሃናና።
- 20 ጎዳይ ፕሮዲዛ ጋላሳይ
ኢንቴስ ቋማፔ አቲን
ፖኦ ጊዳና፤
ሄ ጋላሳይ ኢዛን
አይኮ ፖኦይካ ባይንዳ
 ጊርዲ ጊዳ ቋማ ጊዳና።
- 21 «ታኒ ኢንቴ ላይላን
ላይላን ቦንቺዛ
ባኦሌዛ ካቋይሲኔ ኢጸይስ፤
 ኢንቴ ጎይኖስ ሺቂዛ ሺቆይካ
 ታና ኡፋይሴና።
- 22 ታማን ጸጌቲዛ ያርሾኔ
ካላ ያርሾ
ኢንቴ ታስ ሺሺኮካ
 ታ ሄሳ ኢንቴፌ ኤኪኬ፤

- ዲኬቲዳ አንቱ ማሄታፔ
 አንቱ ታሰ ኢሲፌቴፋ
 ያርሾስ ሺሺኮ
 ታ ኢዛ ኣይፌንካ ጸሊኬ።
- 23 አንቱ ዩዲሼ
 ታ ሃይፋን ካጮፍቴ፤
 አንቱ ዲፋ ገሪስ
 ታ ሲያናስ ኮይኬ።
- 24 ጊዶ አቲን ቱሙ ፒርዳይ
 ጎጊዛ ሃፋ ማላ፤
 ዲሎቴሊካ ሚጮንታ
 ፑልቶ ማላ ጎጎ።
- 25 «ኢሰራኤል አሳዉ!
 ቱማፔ አንቱ ኦይዱ ታሙ
 ላይስ ባዞ ቢታን ዲዛ ዎዴ
 ቱሙ ያርሾኔ ካፋ ጸራ
 ታሰ ሺሺዴቲ?
- 26 አንቱ አንቱስ ኦሊዳ፥
 «ካዎ ዛኩቴ» ጌቲቲዛ
 ኤቃ ጸሳዛ፤
 ቃሴካ፥ «ኬዌኔ» ጌቲቲዛ
 አንቱ ሜዲ ኬሲዳ ጸለንቲ
 ሚሳቲዛ ኤቃ ጸሳታ ቶኪዴታ።
- 27 ታኒ አንቲና ዳማሰቆፌ ጌዴ ሃሳ ጎዳና» ጌስ ጎዳይ ሳሎ
 ጸሳይ።

6

ኢሰራኤል ቃጻዬቴስ

- 1 ጲዮኔን ባዲ ጊ ኡቲዳይቶ! ሳማሪያ ዙማ ቦላ ሂርጋይ
 ባይንዳ ዲዛይቶ! ኢሰራኤል አሳይ ማዶ ኮዪዲ አንቲኮ
 ዪዛይቶ! አንቲኖ ዴሬ ሃላቃቶ! አንቲስ ኣዬ አና!
- 2 ኣኔ አንቲ ጌዴ ካላናሄ ካታማ ቢዲ ጸለቲ፤ ሄፔካ ኣዲዲ
 ሃማቴ ጌቲቲ ዴይጌቲዛ ጊታ ካታማዮኔ ዲጌ ፊሊሰጾሜ ካታማ
 ጌቲ ዎዲቴ፤ ኢሰቲ አንቲ ናሞኡ ካዎቴፋታፔ ሎኢዞ? ኢሰታ
 ቢታይ አንቲ ቢታፌ ኣኪዜ?

3 ኢንቴ ቃሴ፥ «ኢታ ጋላሲ ኤሌ ጋኬና» ጊዛ ቆፋን ኢንቴ ዳናቴላን ጌኔ ኦሶ ኤሶሴታ።

4 ኢንቴ ዳንጋርሳ ዛሌፔ ኦሴቲዳ አልጋን ኢቺታ፤ ኦሃላ ላቃ አሾኔ ማራ አሾ ሚሼ ሶፋ ቦላ ኡቲ ሼምፔታ።

5 ዳዊቲ ማላ ዬላ ሚሽ ኢንቴሰ ገግሲዲ ባጋናኒኔ ዱማ ዱማ ማዛሙሬ ዬዲዛይቶ!

6 ዎይኔ ኡሹ ቢሪሌራ ጊዶንታ ኦቶራ ኡዪዛይቶ! ኬሂ አልኦ ጊዲዳ ሺቶ ቲዬቲዛይቶ! ኢሰራኤሌ ዴራ ቦላ ጋኪዳ ሜቶ ጊሻሰ ቃጴቶንታይቶ ኢንቴና አዬ አና!

7 ሄሳ ጊሻሰ ሄራ አሳፔ
ኮይሮ ኢንቴ ዲኤታና፤
ሄ ዎዴ ኢንቴ ካሴ ኡፋይሳን
ጉፒዛ ጉፋይኔ
ባጂ ጊ ዲዛ ዱሲ አታና።

8 ጎዳይ ሳሎ ጸሳይ፥
«ኢሰራኤሌ አሳ ኦቶሬቴላ
ታኒ ሃራሴታዲሰ፤
ኢሰታ ሚጸቲካ
ታና ሹኔቴሰ፤
ሄሳ ጊሻሰ ታኒ ካታማዮኔ
ኢዚን ዲዛይታ ኡባ
ሞርኬሰ አላ ኢማና» ጊዲ
ባርካ ባናን ጫቂዴሰ።

9 ኢሲ ኬላን ታማቲ አቲኮ ሄ አቲዳይቲካ ሃይቃና።

10 ሃይቂዳይታፔ ኢሳዴሰ ማታ ዳቦ ጊዲዳዴይኔ ሞሳ ዎጋ ፖሊዛዴይ አሃዛ ኬላፌ ኬሲ ኤፋና፤ ሄ ዎዴ ኢዛዴይ ሶን ዲዛ ኢሲ አሰ ጴይጊዲ፥ «ኔናራ አቲዳ ሃራ አሲ ዲዜ?» ጊዲ ኢዛ ኦይቻና ሺን ኢዛዴይ ቃሴ፥ «አቲዳ አሲ ኦኒካ ዴና» ጋና። ኦይቺዛይሲካ ዛሪዲ፥ «ጎዳ ኑ ጸሳ ሱጎል ጴይጋናሰ ቤሶንታ ጊሻሰ ጮኡ ጋ!» ጋና።

11 ጎዳ አዛዘን
ዎጋ ኬላቲ ላሌታና፤
ጉላ ኬላቲካ
ላሌቲ አታና።

12 ፓራይ ሹቻ ቦላ ቶጌቲዜ?
ጎሻንቻይ አባ ጊዶን
ቦራ ዋጺ ጎያናሰ

ዳንዳይዜ?
 አንቲ ጊዲኮ
 ፒርዳ ማርዜን ላሚዳታ፤
 ቱማካ ጌዴ ጫሞን ሸርዳታ።

- 13 አንቲ ሎዲባሬ ካታማ
 ጸኒዳ ገሻሰ ኡፋዬቲዳታ፤ *
 «ቃርናይሜ ካታማዮ
 ኑኒ ኑ ዋልቃን ኦይኪዶሰ»
 ጊዲ ጨቄቱታ። †

- 14 ጎዳይ ሳሎ ጸሳይ፥
 «ኢስራኤል አሳዉ!
 ታኒ አንቲ ቦላ
 ሃራ ዋልቃማ ዴሬ ዴንፋና፤
 ሄሲካ ፑዴሃ ባጋፌ
 ሃማቲ ፔንጌፌ ዶሚዲ
 ዱጌሃ ባጋራ አራቤ
 ሾባ ጋካናሰ አንቲና
 ኡንኤፋና» ጌሰ።

7

አዋጁ አጂታን ቤኢዳ ቦሌ

¹ ጎዳይ አጂታን ቦሌይ ያናይሳ ታና ቤሲዴሰ፤ ሄኮ ካዎ ካሏ ማጾቲ ዉሪዳፔ ጉዬ ጌዶራ ጫሪዳ አዛባ ካላ ቦላ ጸሲ ማቲ ቦሌይ ኬዛና ማላ ኦሊዴሰ።

² ቦሌዚካ ቢታ ቦላ ዲዛ ጨሊላ ኡባ ፒቲ ሚዳይሳ ታኒ ቤያዳ፥ «ኡባፌ ዋልቃማ ጎዳዉ! ኔ ዴሬ ቆሆዛ ማራርኪ! ኔ ዴሬ ኢስራኤሌሰ ዋልቃይ ባይንዳ ገሻሰ ኢዚ ሃይሳ ዋስቲ ኤቄቲ ዳንዳይ?» ጋ ዋሳዲሰ።

³ ጎዳይካ ኢስታሰ ሚሹቲዲ፥ «ሃይሲ ኔ ቤኢዛይሲ ፖሌቲና» ጊዲ ታሰ ዮቲዴሰ።

አዋጁ አጂታን ቤኢዳ ፒርዳ ታማ

* **6:13** ሎዲባሬ ጌቲቲዛይሲ ካታማ ሱንሐ ጊዲሺን ኢብራዊታ ቃላራ ሃዳ ሚሽ ጉሳ። † **6:13** ቃርናይሜ ጌቲቲዛይሲ ጉላ ካታማ ሱንላ፤ ኢብራዊታ ቃላራ ካጨደ ዋልቃ ለሚሶ ጊዲ ቤቲሰ።

4 ኡባፌ ዋልቃማ ጎዳይ ታና አጁታ ቤሲዳስ፤ ጎዳይ ቃጸያናስ ታማ ፒርዳ ዩዲዳስ፤ ታማዚካ ዋጋ ጌታ አባ ሚቹዲ ቢታ ሙሰ ኦይኪዳስ።

5 ሄ ዋዴ ታኒ፡ «ኡባፌ ዋልቃማ ጎዳዉ! ሃይሳ ታማ ቶይሳርኪ! ኔ ዴሬ ኢሰራኤሌስ ዋልቃይ ባይንዳ ገሻስ ኢዚ ሃይሳ ዋስቲ ኤቄቲ ዳንዳያኔ?» ጋ ዋሳዲስ።

6 ጎዳይካ ኢስታስ ሚሼቲዲ፡ «ሃይሲ ኔ ቤኢዛይሲ ፖሌቲና» ጌዲ ታስ ዮቲዳስ።

አሞጾይ አጁታን ቤኢዳ ቱምቤ

7 ጎዳይ ታና ሃራ አጁታ ቤሲዳስ፤ ቱምቤን ሲቲ ጌ ኦሴቲዳ ገምቤ አቻን ጸሲ ባ ኩሼን ቱምቤ ኦይኪ ኤቄዳይሳ ቤያዲስ።

* 8 ኢዚካ፡ «አሞጾ! ሄሲ ኔ ቤኢዛይሲ ኢዚ አዜ?» ጌ ኦይቹዳስ። ታኒካ፡ «ቱምቤኮ!» ጋዲስ። ጎዳይ ዛሪዲ ታስ፡ «ቱምቤን ሲቲ ጌ ኦሴቶንታ ገምቤ ማላ ታ ዴሬ ኢሰራኤሌይ ጌላቲዳስ፤ ሄሳ ገሻስ ሃይሲ ቱምቤዚ ኢሰራኤሌ ናይታ ጌላቴላ ቤሲዛ ለሚሶ፤ ታኒካ ኢስታ ቃጸዮንታ አገኬ።

9 ዩሳቂኔ ኢዛስ ናዛ ናይቲ ጎይኒዛ ቶቃሶሆቲ ላሌታና፤ ኢሰራኤሌ ናይቲ ጎይኒዛሶሆቲ ላሌታና፤ ኢዮርባኣሜ ካዋቴሐ ታኒ ሙሌራ ቆይሳና» ጌዳስ።

አሞጾኔ አማሲያሲ

10 ቤቴሌ ቂሴ ጌዲዳ አማሲያሲ ኢሰራኤሌ ካዋ ኢዮርባኣሜኮ፡ «ሄኮ አሞጾይ ኢሰራኤሌ አሳ ጌዶን ኡቲዲ ኔ ቦላ አሳ ዴንፊሌስ፤ ሄሳ ማላ ኦሶን ቢታ ሺሪ ዩጌስ።

11 ኢዚካ፡ «ኢዮርባኣሜይካ ኦላን ሃይቃና፤ ኢሰራኤሌ ዴሬይ ባ ዴሬፔ ዲኤቲ ባና ጌስ» ጌ ከቲዳስ።

12 አማሲያሲ አሞጾስ፡ «ኔኖ አጁታ ቤኢዛይሶ! ሃይሳፌ ዴንዳ ኪቻ፤ ዱጌ ዩሁዳ ቢታ ባዳ ሄን ቲንቢቲ ዮታሼ ኔስ ሚዛ ሚሽ ዴማ።

13 ቤቴሌይ ጌዲኮ ካዋይ ጎይኒዛሶኔ ካዋ ዱሳሶ ጌዲዳ ገሻስ ቲንቢቲ ዮቶፓ» ጌዳስ።

14 አሞጾይ አማሲያሳስ፡ «ታኒ ዉዴ ሜሄ ሄሚዛዴኔ ኤላ አይፌ ማጺዛዴ አቲን ታ ሁኤስ ናቤ ዋይኮ ናቤ ና ጌዲኬ። †

* 7:7 ቱምቤይ ገምቤ ገምቤዛይቲ ገምቤዛ ሲቲ ሂስቲ ገምባናስ ጎኤቲዛ ሚሽ።

† 7:14 ኤላ አይፌ፡ ኤላ አይፌ ጌቲቲዛይሳ ኢሲ ኢሲ ባጋ ጋሞላ ቃላን ቦባ አይፌ ጌቲቲስ።

15 ጊደ አቲን ጎዳይ ማሄ ሄማዛሶሆፔ ታና ጾይጊዲ፥ «ባ!
ታ ዳሬ ኢሰራኤልስ ተንቢቱ ዮታ፤ ጊዲ አዛዚዲይ ጎዳ።

16 «ሃኢካ ጎዳይ ኔና ጊዛይሳ ሲያ፤
ኔኒ ታና፥ «ኢሰራኤል አሳ ቦላ
ተንቢቱ ዮቶፓ፤
ዪሳቃ ዜሬሐ ጊዲዳ ኢሰራኤል
ዳሬዛካ ሳባኮፓ፤ ጋ ዲጋዳሳ።

17 ሄሳ ጊሻሰ አማሲያሳ!
ኔ ጊሻሰ ጎዳይ፥
«ኔ ማቼያ ካታማ ጊደን
ላይማ ማጫሰ ጊዳና፤
ኔሰ ማጫ ናይቲኔ አቱማ
ናይቲካ አላን ሃይቃና፤
አላጋቲ ኔ ቢታ
ዎደሮን ዋፏ
ጊሼቲ ኤካና፤
ኔኒካ አላጋ ቢታን ሃይቃና፤
ኢሰራኤል አሳይ ባ ቢታፊ
ዲኤቲዲ አላጋ
ዳሬ ባና፤ ጌሰ»
ጊ ዮቲዴሰ።

8

አዋጁይ አጂታን ቤኢዳ ቲራይ ኩሚዳ ኬሼ

1 ኡባፊ ዎልቃማ ጎዳይ ታና ሃራ አጂታ ቤሲዴሰ፤ ሄሲካ
ቲራይ ኢዛን ኩሚ ዲዛ ኬሼ።

2 ጎዳይ ታና፥ «ሄሲ ኔ ቤኢዛይሲ አዜ?» ጊ ኦይቺዴሰ፤
ታኒካ ኢዛሰ፥ «ቲራራ ዲዛ ዳቾ ቤያይሰ» ጋዲሰ፤ ቃሴካ ጸሲ
ታሰ፥ «ታ ዳሬ ኢሰራኤልስ ወርሴላ ጋኪዴሰ፤ ሃይሳፊ ጉዬን
ታኒ ኢሰታ ቃጸዮንታ አጊኬ።

3 «ኢሰቲ ጸሳ ኬላን ሲሲዛ ዬላይ ሄ ዎዴ ዬሆን ላማታና፤
ዳሮ አሳ አሃይ አዋን አዋንካ ኩንዲ አታና፤ አዋንካ ጮ ዬጌቲ
አታና» ጌሰ።

ኢሰራኤል ኩንዴሐ

4 ኢንቴኖ ሜቶቲዳ አሳ ቆሂዛይቶ!
ቃሴ ማንቆታ ቢታፊ ጳይሳና
ኮይዛይቶ! ሃይሳ ሲዪቲ!

- 5 ኢንቴ፥ «ኑኒ ኑ ካላ
 ባይዛና ማላ
 አገና ጾርን ቦንቺዛ
 ባኣሌይ ኣይዴ ኣቋኔሻ!
 ኑኒ ካላ ጊያ ጌልላናሰ
 ሳምባታይካ ኑሰ ኣይዴ
 ኣቋኔሻ!
 ሄ ባኣሌይ ኣቋኑ
 ኑኒ ማካ
 ሚሻ ጉሊዲ
 ኣልኦ ዋጋን ባይዛና፤
 ቃሴካ ዋርዶ ሜዛኔን
 ኣሳ ባሌላና።
- 6 ጊሰቴ ሃርቆካ ሙሩታ
 ጊሰቴ ዋጋን ባይዛና፤
 ማንቆታ ቢራን፥ ሜቶቲዳይታካ
 ቶሆ ጫማን ሻማና» ጌታ።
- 7 ያቆቤይኔ ኢዛ ዜሬላቲ ኢዛን ጨቄቲዛ ጎዳይ፥ «ኢሰቴ
 ኦሊዲ ኦሶ ኡባ ታኒ ባሊኬ፤
- 8 ሃይሳ ጌዶን ቢታይ ቡሮ ቃጸና፤ ቢታይ ቦላ ዲዛይ ወሪካ
 ዬካና፤ ኣባዬ ሻፋይ ኪጺዲ ጉሚዛይሳላ ቢታ ኡባይ ቃሊ
 ዮሺኩዮሺካና» ጊዲ ባርካ ባናን ጫቂዴሰ።
- 9 ኡባፌ ዋልቃማ ጎዳይ፥ «ሄ ዋዴ ታኒ ጋላሳ ሴታን ኣዋ ኣርሼ
 ወልሳና፤ ጋላሳ ሴታን ጋዴ ቋሚሳና።
- 10 ኢንቴ ላይላን ላይላን ቦንቺዛ ባኣሌዛ ዬሆን ላማና፤ ኢንቴ
 ዬጺዛ ዬላካ ዋሶን ላማና፤ ዲዛ ፔጺ ኢሲ ናይ ሃይቂን ጫሞ
 ዬሆ ዬኪዛ ኣሳ ማላ ኢንቴ ኢንቴ ሁኤ ቢናና ቡጨዲ ማቃ
 ማይኣና ማላ ታኒ ኢንቴና ኦላና፤ ሄ ወርሴላ ጋላሳይ ጫሞ ጋላሰ
 ጊዲና።
- 11 ሄኮ ታኒ ቢታ ቦላ ኮሻ ኤሃና ዋዴይ ያና፤
 ሄሲካ ኣሳይ ጸሳ ቃላ
 ሲያና ጋፋኔ
 ሳሞ ኣቲን ካላ ጋፋኔ
 ሃላ ሳሞ ጊዴና።
- 12 ዴሬይ ወሪ ፑዴሃፔ
 ዲጌሃ ጋካናሰ
 ኣርሼይ ሞኪዛሶፔ
 ወሊዛሶ ጋካናሰ

- ጎዳ ቃለ ኮሽ
ያኔ ሃ ይሞታናሺን
ዴሜና።
- 13 ሄ ዎዴ ሎኦ ጌላኦቲኔ
ሚኖ ፓንላቲ
ሳሞፔ ዴንዳናይሳን
ዳቡራና።
- 14 ሳማሪያ ዴሬን፥ «አሻሞ»
ጌቲታ ዴይጌቲዛ
ኤቃ ጸሳይን ጫቂዛይቲ፥
«ዳኔ ጸሳይ ቤዪን»
ዎይኮ፥ «ቤርሳቤሄ
ጸሳይ ቤዪን»
ጌ ጫቂዛይቲ ወሪካ ኩንዳና፤
ባ ኩንዲዲሶሆፔ ሙሌካ
ዴንዳናሰ ዳንዳዬቴና» ጌሰ።

9

ኢስራኤል ቦላ ያና ፒርዳ

- 1 ጎዳይ ያርሾ ያርሺዛሶዛ ሚሌን ኤቂ ዲሺን ታ ቤያዲሰ፤
ኢዚካ ታና፥
«ጸሳ ኬላ ዮቻይ
ቃጸና ጋካናሰ
ኬላ ቁሰቴ
ሾጫ ላላዳኔ
ኣሳ ቦላ ኩንዳና ማላ ኦላ፤
ሄሳፌካ ኣቲዳይታ
ታኒ ኢሰታ ማሻራ
ዎቆ ቆይሳና፤
ኢሰታፌ ኦኒካ ባቃቴና፤
ባቃቲኮካ ታፔ
ኬሲ ኤኪ ኣቴና።
- 2 ኢሰቲ ዱፎ ቦኪ ጌሊዳኮካ
ታ ኩሼይ
ኢሰታ ሄፔ ሾዲ ሃ ኬሳና፤
ኢሰቲ ፑዴ ሳሎ ኬዚዳኮካ
ታኒ ኢሰታ ሄፔ
ሃ ዱጌ ጎቻ ዎላና።

3 ኢሰቲ ዩዴ ቃርሜሎሴ ዙማ ቦላ
ኬዚ ቆቴቲዳኮካ
ታ ካሌታ ባዳ
ኢሰታ ሄፔ ዋላና፤
ኢሰቲ ዱጌ ጨማ አባ ጊዶ
ጌሊዲ ታፔ ቆቴቲዳኮካ
ሄን ኢሰታ ሾሺ ዱካና ማላ
ታ አዛዛና።

4 ኢሰቲ ባ ሞርኬታ ኩሼን
ዲኤቲ ቢኮካ
ሄን ኢሰቲ ማሻን
ሃይቃና ማላ
ታ አዛዛና፤
ታኒ ኢሰታ ቦላ
ታ አይፌ ሎኦስ ጊዶንታ
ኢታስ ዛራና» ጊ አዛዚዴስ።

5 ኡባ ሃሪዛ ጎዳይ
ኢዚ ቢታዮ ቦቼስ፤
ኢዛካ ሴራዉስ፤
ኢዚን ዱዛ ኡባይ ዬኬስ፤
ናይሌ ሻፋይ
ኪጸ ጉሚዛ ማላ
ቢታ ኡባይ ቃጾስ፤
ቃሴ ዛሪዲ ኪጸ ሃሊ
ዋጂዛ ማላ ዋጃና።

6 ባ ዱሳሶ ሳሎ ኦሊዳይ፥
ሳሎካ ሳኦፔ ቦላን
ሚንሊዳይ፥
አባ ሃላ አዛዚዲ
ቢታ ቦላ ጎጊሲዛይ
ኢዛስ ሱንሳይ ጎዳ።

7 ጎዳይ፥ «ኢስራኤል አሳዉ!
ኢንቲ ታስ
ቶጵያ አሳ ማላ ጊዴኬቲ?
ታኒ ኢንቲና
ጌብጾፔ ኬሶይሳ
ፊሊስጾሜ አሳ ቃርጾሴፔ
ቃሴ ሶሪያ አስ

- ቂሬፔ ኬሳቤኪና?
 8 ታኒ ኡባ ሃሪዛ ጎዳይ
 ጌዴ ናጋራንቻ
 ኢሰራኤል አሳ
 ካዎቴላኮ ጸላይሰ፤
 ታ ኢዛ ቢታፌ ሙሌራ ዳይሳና፤
 ጊዶ አቲን ያቆቤ ዜሬል
 ኡባ ዳይሰኬ» ጌሰ።
- 9 «ቤኢቲ ካል
 ዛይዛሬን ዛይዛሪዛ ማላ
 ኢሰራኤል አሳ
 አይዛቤ ካዎቴላ
 ጊዶን ዛይዛራና ማላ
 ታ አዛዛና፤
 ጊዶ አቲን ኢሰታፌ ኢሳዴይካ
 ዋራ ዋጂ ዳዬና።
- 10 ሉባ ቦላ አይኮ ኢታይካ ጋኬና
 ዋይኮ ኡና ቦቹና፤ ጊዛ
 ታ ዴሬ አሳ ጋርሳን ዲዛ
 ናጋራንቻቲ ኡባይ
 ኦላን ሃይቃና» ጌሰ ጎዳይ።
- ኢሰራኤል አሳ ሲሞ ሂደታ
 11 «ጮ ኩንዲ ላሌቲዳ ኬላ ማላ ጊዲዳ
 ዳዊቲ ዜሬላታ ካዎቴላሰ
 ታኒ ዛራ ኡሳና ዋዴይ ያና፤
 ታኒ ገምቤዛ ዛራ ገምባና፤
 ላሌቲዳይሳካ ኦራጺሳና፤
 ካሴይሳሶ ዛራ ኦላና።
- 12 ሃሳሶካ ኤዶሜ ዴሬን
 አቲዳይታኔ
 ታ ሱንሳን ዴይጌቲዳ ዴሬታ
 ኡባ ኢሰቲ ላታና»
 ጌሰ ጎዳይ።
- 13 «ካል ማጺዛይቲ ማጺ ዉርሶንታ
 ዲሺን ጎሻ ዋዴይ ጋኬሰ፤
 ዋይኔ አይፌ ጉሞኢዛዴይ
 ጉሞኢ ገሳንታ ዲሺን

ዎይኔ ፑቲ
 ቶኪዛ ዎዴይ ጋኬሰ፤
 ሄ ዎዴ ማልኢዛ ሎኦ ዎይኔ
 ኡሺ ዙማፔ ፑልታና፤
 ዙምቡላታፔካ ጎጋና።

- 14 ዲኤቲ ቢዳ ኢሰራኤሌ አሳ
 ሃ ኢሰታ ዴሬ ዛራ ኤሃና፤
 ላሌቲዳ ካታማታ ዛሪ
 ኬዲዲ ኢዛን ዴኣና፤
 ኢሰቲ ዎይኔ ቶኪዲ
 ኢዛፔ አጌቲዳ ኡሹ ኡያና፤
 ዲማ ዲማ አይፊዛ ሚሶ
 ቶኪዲ ኢዛ አይፊ ማና።

- 15 ታ ዴሬ ኢሰራኤሌ አሳ
 ታኒ ካሴ ኢሰታ ቢታን
 ዛራዳ ቶካና፤
 ታኒ ኢሰታሰ ኢሚዳ ቢታፌ
 ኢሰቲ ናምኣንሶ ጶቃሌቲ
 ዳዬቴና»
 ጌሰ ጎዳይ ሳሎ ጸሳይ።

ጌሻ ማጸፋ

Gamo: ጌሻ ማጸፋ Bible of Ethiopia, Ethiopic script

copyright © 2024 The Word for the World International

Language: Gamotso (Gamo)

Contributor: The Word for the World Northern Africa

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

PDF generated using Haiola and XeLaTeX on 2 May 2025 from source files dated 3 May 2025

d0ee6825-f93e-584e-8c8f-567d8d068e4b